



N°5192  
Reçue le 08.11.2021  
Déclarée recevable  
Président de la Chambre des Députés  
(s.) Fernand Etgen  
Luxembourg, 08.11.2021

**Här Fernand Etgen**  
**President vun der Chamber**

Lëtzebuerg, den 8. November 2021

Här President,

Esou wéi den Artikel 80 vum Chambersreglement et virgesäit, bieden ech lech, dës parlamentaresch Fro un d'Madamm Ëmweltministesch an un den Här Mobilitéitsminister weiderzeleeden.

Zanter sëllege Jore gëtt vum Contournement ronderëm d'Gemeng Hesper geschwat. Am Joer 2008 gouf dës Strooss an de PST (Plan sectoriel Transport) ageschriwwen. Déi nei N3 ass integrale Bestanddeel vum MoDu-Konzept, dat am Joer 2012 presentéiert ginn ass. Am Fréijoer 2017 war eng Presentatioun vun enger Rëtsch vu Varianten zu Réiser, déi do de Gemengeréit vu Réiser a vun Hesper virgestallt goufen. De Gemengeresponsabelen gouf deemools zougeseot, datt d'Consultation publique Enn 2017 sollt ofgehale ginn. Zanterhier ass ëmmer nees vun neie Varianten Rieds gaang.

Den 1. Juli vun dësem Joer huet den zoustännege Mobilitéitsminister déi lescht Varianten vun dëser Strooss opgezeecht – mam Versprieche, datt déi definitiv Consultatioun am Hierscht vum Joer 2021 soll sinn. De Visiteure vun dëser Presentatioun gouf zougeseot, datt den Avis vum Ëmweltministère innerhalb vun dräi Méint géif virleien.

Mir sinn elo praktesch um Enn vun dësem Joer ukomm, an den Avis läit nach ëmmer net vir. An dësem Kontext wéilt ech folgend Froen un d'Madamm Ëmweltministesch an un den Här Mobilitéitsminister stellen :

- Kann déi zoustännege Ëmweltministesch mir soen, fir wéini mat dësem Avis ze rechnen ass?
- Kann den zoustännege Mobilitéitsminister mir soen, wéini d'Consultation publique soll sinn?
- Wéini kann de Regierungsrat mat enger definitiver Decisioun iwwert den Tracé saiséiert ginn?
- Wéini gëtt d'Finanzéierungsgesetz deposéiert?

Här President, ech bieden lech, mäin déifste Respekt unzehuelen.

Marc Lies

Deputéierten



**Gemeinsam Äntwert vum Minister fir Mobilitéit an ëffentlech Aarbechten a vun der Ministesch fir Ëmwelt, Klimat an nohalteg Entwécklung, op d'parlamentaresch Fro n° 5192 vum 8. November 2021 vum honorabelen Deputéierte Marc Lies**

De genannten Avis, deen am Aklang zur Prozedur déi d'Gesetz vum 29. Mee 2009 virgesäit, ausgestellt ginn ass, ass den 22. November 2021 vum Ëmweltministère u mech iwwermëttelt ginn.

Dësen Avis gëtt am Abléck vu mengen zoustännege Servicer analyséiert. Dobäi gëtt zu verschiddenen Elementer Stellung geholl, déi dann och a den Dossier afléisst, deen uschléissend an d'ëffentlech Consultatioun geet.

Konform zum Artikel 7 vum uewe genannte Gesetz, gëtt den adaptéierten Dossier also Mëtt Januar 2022 a der Gemeng Hesper deposéiert. Dëst ass déi Etapp an dem de Public den Dossier op der Gemeng ka consultéieren an seng Observatiounen respektiv Objektivatiounen äussere kann.

Ueschléissend an am Respekt zum Artikel 8 vum Gesetz vum 2009, gëtt de Regierungsrot mam Dossier zesumme mam Resultat vu der Consultatioun an der Gemeng Hesper a de ugränzende Gemenge befaasst. De Regierungsrot huet dann all d'Informatiounen betreffend dësem Projet virleien a decidéiert wéi eng Variant soll realiséiert gi mat dem Ëmfang vu de Kompensatiounsmoosnamen.

Doropshi kann da souwuel de Bauprojet vum Contournement wéi och de Projet vun de Kompensatiounsmoosname weider ausgeschafft ginn, bis zu engem Niveau, ob Basis vun dem ee Finanzéierungsgesetz an der Chamber kann deposéiert ginn.

Lëtzebuerg, den 13/12/2021

De Minister fir Mobilitéit an ëffentlech Aarbechten

(s.) François Bausch